

## **Hascht mich gsiehn – un fort war er**

Mei Vater geht em 88. Lewesjohr entgeije. In seim Alter muss er mitm krumme Stecke tripple, es geht ganz langsam beim Spaziere. Was is uns awer vor Täch passiert? Ich sin jetzer in Deitschland. Un mir sin e halwi Stund spaziere gang. Jetz war der aldi Mann mied un ment, zurück fahre mer awer mitm Bus. Mir han uns in die Halterstell ghuckt, es war noch finf Minute zu warte. Un genau uf die Minut pinktlich is des Bus a schun an uns vorbei gerast – hascht mich gsiehn, un fort war er. De Vati hat noch mitm krumme Stecke gflatschert, der Busfahrer is awer nit stehn geblieb. Er muss uns doch sitze gsiehn han!! Doch es is uns nix anres iwrich geblieb, wie wieder zufuss zruckzus zu gehen, weil de näkschte Bus wär erscht in eener halb Stund kumm.

Zwaa Täch druf war ich inkaafe, un weil ich ufgebindelt war, han ich mit meim Bagasch hemzus fahre wille. Dorte han ich noh gstann in dere Halterstell. Immer meh Leit sin beikumm, de Bus hätt schun längscht do sin misse. War er awer nit. Die Leit han anfang ungeduldich zu gin, doch kenner hat zu schenne anfang. Scheen han alli gewart, es war e Bus ausfall, un wie der näkscht kumm is, han nor die Hälft vun de Leit ufsteije kenne, so voll war er. Ich sin mit meine Bindle nit nufkumm. Also was is iwrich geblieb, wie weiter warte – uf de näkschte Bus.

Do han ich mer wieder mol denke misse, nit nor bei uns in Temeschwar, nee, ach in Deitschland kann e Busfahrt mit Hinnernisse verbunn sin!

## **Am bescht, wann mer mit Doktre nix zu tun hat**

Ja, gelt des is doch so! Wer will schun krank sin un zum Dokter laafe? Wanns awer doch sin muss, mir kenne doch alli unser Doktre. Mer muss warte, git vun heit uf morje vertreescht. Un wann mer dann noch ins Spital muss, do muss mer halt bleche, dass mer anständig (soweit des meeglich is) behandelt git.

Un ich han halts gement, dass des in dem Deitschland ganz anerscht is. Han mer vorgstellt, dass mer do sei Termin kriet, alles in beschter Ordnung un ohne Wartezeit abgeht. Doch so kann mer sich teische! Ich sin in der vergangeneni Wuch mit meim Mädln zu meh Doktre gang, es hat sich nit gut gfiehl. Beim erschte han mer um 8 Uhr am Morjet sin misse, for „Zetl ziehe“. Wie mer noh e Nummer ghat han, is uns gsaat gin, die Wartezeit is bis zu zwaa Stunde. Do sin mer halt e Kaffee trinke un bissl spaziere gang. Wie mer zruck kumm sin war es Wartezimmer gstuppte voll, Zetl hat kenner me ziehe kenne, weil's inzwische halwer uf zehni war. Endlich um 12 Uhr sin mer an die Reih kumm. Jetz war ich awer paff. Der Dokter is in vier Behandlungszimmre hin un her geloff, in jedem war e Kranker. De eene hat er abghorcht, de anre unersucht, de dritte ausgfroot un uns ufm Stuhl sitze gelosst. Wie er endlich bei uns anlangt, hat er mei Mädln angeschaut un gsaat, des wär nit sei Bereich. Er hat uns zu eem anre Dokter gschickt.

E Taa druf han mer nochmol vun vore bei dem näkschte Dokter anfang, es is nochmol e halwe Tach drufgang un mir ware so schlau wie zuvor. Weil der hat uns wieder zu eem dritte Dokter gschickt. Jetz ware mer die Laaferei satt un sin zwaa Täch druf in e Privatklinik zur Unersuchung. Des hat e Schippl Geld gekoscht. Mir sin awer gleich an die Reih kumm, die Unersuchung hat e halwi Stund gedauert. Noh han mer unser Geld los ghat, han awer gewisst, dass des Mädln gar nit krank sunder nor iwermied is un Urlaub mache soll. Jetz ware mer halt lamuriert!